

Pemantauan dilakukan terhadap warga asing 'berkelakuan pelik' dalam PRU13, kata PAS

Malaysian Insider

May 4, 2013

Oleh Zurairi AR

KUALA LUMPUR, 4 Mei — Sukarelawan PAS akan berada di tempat tertentu di seluruh negara untuk memantau terutamanya terhadap warga asing, yang berkelakuan pelik dan mungkin mengundi esok, kata naib presiden Salahuddin Ayub hari ini.

Ini berlaku kerana ketakutan mengenai warga asing diterbangkan ke semenanjung Malaysia untuk mengundi sebagai pengundi hantu yang kecoh beberapa hari menjelang Pilihan Raya 2013 walaupun kedua-dua Suruhanjaya Pilihan Raya (SPR) dan pasukan polis telah menafikan perkara ini.

"Semenjak keluar berita semalam, kami telah merancang strategi untuk memantau dan kami telah menghantar laporan ke pusat operasi kami," kata Salahuddin kepada The Malaysian Insider hari ini.

"Kami mahu memberitahu mereka, jangan fikir pergerakan dan tindakan mereka tidak diperhatikan," katanya.

Menurut Salahuddin, agen dari PAS dan juga parti lain dalam Pakatan Rakyat (PR) melakukan pengintaian hari ini, dibantu oleh maklumat daripada orang ramai.

Ejen-ejen diletakkan di pelbagai tempat, termasuk stesen bas, lapangan terbang, dan kediaman tetapi Salahuddin enggan mendedahkan maklumat terperinci mengenai ejen-ejen kerana bimbang dengan keselamatan mereka.

Tan Sri Khalid Abu Bakar mengatakan hari ini mustahil bagi warga asing untuk mengundi esok dan polis akan mengambil tindakan sekiranya berlaku.

Timbalan ketua polis negara itu mengecam pihak tidak bertanggungjawab yang menyebarkan khabar angin mengatakan warga asing akan mengundi, malah mereka tidak menerima sebarang laporan rasmi tentang perkara tersebut.

Setiausaha agung Umno Datuk Seri Tengku Adnan Mansor semalam berkata "rakan" BN sedang membantu mereka menerbangkan pengundi pulang ke semenanjung tetapi menegaskan ianya sebahagian daripada kempen parti "keluar mencari undi" untuk Pilihan Raya 2013.

Ketua Pembangkang Datuk Seri Anwar Ibrahim mengatakan semalam terdapat 40,000 pengundi diragui, termasuk rakyat asing dari Sabah dan Sarawak telah diterbangkan masuk dari Sabah dan Sarawak semenjak minggu lepas ke negeri-negeri utama di semenanjung seperti Selangor dan Kuala Lumpur.

Pejabat Perdana Menteri menafikan sebarang penglibatan berhubung dakwaan Pakatan Rakyat (PR) rakyat Malaysia dan juga warga asing diterbangkan ke semenanjung untuk mengundi pada pilihan raya umum, Ahad ini.

Syarikat penerbangan nasional MAS juga telah menafikan dakwaan ia akan menggerakkan penerbangan sewa khas untuk mengangkut pengundi hantu.

Kumpulan Asalkan Bukan Umno (ABU) juga telah memasang kain rentang di seluruh semenanjung Malaysia yang memberikan amaran kepada warga asing supaya tidak mengundi pada Pilihan Raya 2013, mengancam mereka akan diserahkan kepada pihak polis jika berdegil.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/pemantauan-dilakukan-terhadap-warga-asing-berkelakuan-pelik-dalam-pru13-kata-pas/>